

## “Vida, obra e milagres do colectivo Polaqaia”

Discurría o verán do ano **2001** cando uns cantos rapaces con vontade de publicar e sen nada que perder xuntaron forzas e azos diante do ermo baldío que daquela era o panorama do cómic en España, e se aí era un ermo, en Galicia a cousa tornábase estepa siberiana.

Eses cinco valentes eramos **Kike Benlloch, Bernal Prieto, Jano Viñuela, Alberto Vázquez e servidor**, e o as que tiramos da manga para comezar a autopublicarnos recibiu o nome de **Polaqaia**.

Ás primeiras publicacións baixo o selo empezaron a unirse novos membros en canto outros abandonaban-en pos doutras aventuras editoriais- a nave, este sangue novo levaba o nome de **Emma Ríos, Hugo e Sergio Covelo, Diego Blanco, Brais Rodríguez, Roque Romero, Álvaro López, José Domingo e Luís Sendón**, e coas súas aportacións a cousa pasou de dar pequenos pasos a abrírnos camiño a alcandadas; xurdiu **Barsowia**, o buque insignia do colectivo, un fanzine que deu cabida ao melloriño do panorama tebeístico galego, español e internacional, capaz de lograr premios de relevancia dentro do medio como senllos galardóns da Crítica e do Público no Salón internacional do Cómic de Barcelona, ou o Gran Premio das Xornadas de Ourense, e ser unha de las poucas publicacións realizadas integramente en lingua galega que se distribuíron –je venderon!- por toda a xeografía española.

En todos estes anos, levan saído á luz baixo o amparo de Polaqaia decenas e decenas de títulos, entre novelas gráficas, comic-books, fanzines, sketchbooks, láminas, camisetas e un senfín de actividades e exposicións de toda índole. E **todo isto sen chupar un peso dos cartos públicos**, sen solicitar subvencións, sen recurrir a favores nin visitar despachos, que isto tamén hai que dicilo, xa que non é moi común por estes lares a **cultura autoxestionada**, nunca nos fixemos ricos con Polaqaia –nin o pretendemos- mais tampouco perdemos cartos.

E após este breve resume do que é e tén sido Polaqaia, e hoxe, **dez anos despois** daquel verán de 2001, tan só resta despedirnos, vestir as nosas mellores galas e saír pola porta grande, coa conciencia tranquila de que temos realizado ben o noso traballo, superado as nosas expectativas e sentado cátedra. Polaqaia fundouse cun obxectivo concreto; satisfacer a vontade de publicar tanto dos seus membros como de moitos outros autores alleos ao colectivo que pasaron polas nosas páxinas, e ese obxectivo logrouse cun éxito rotundo: A día de hoxe moitos de nós estamos xa publicando tanto dentro como fóra de Galicia, mesmo internacionalmente, e con éxito; misión cumprida.

Carece de sentido que Polaqaia siga existindo a día de hoxe, e estou certo de que das súas cinzas xurdirán non un, senón moitos máis proxectos e aventuras editoriais que enriquecerán o panorama actual e futuro do cómic dentro e fóra das nosas fronteiras aínda máis.

Con esta exposición inaugúrase a conta atrás para **a morte de Polaqaia**, de aquí a final de ano iredes recibindo noticias dos diferentes eventos e publicacións que realizaremos para despedirnos de vós como merecemos e merecedes; ao grande, e o **31-12-2011 Polaqaia deixará de existir**.

Foi un pracer combatir a carón de vós durante estes últimos dez anos, vémonos na outra vida, que din que é mellor, e de non ser así, bateremos onde mais doe ata que o sexa, somos expertos niso.

¡¡Deica a próxima!!

David Rubín.